

# 1 Timoteo

---

## 'Ka amõñiguh' chib pørig

**1** <sup>1</sup>Na Pablo Jesucristo nõashib karua ørig, Tius namui Kaigyugurri Wesrabiiba, Cristo Jesús, tru nam nundø isua munig melaig truiiba karua pasrig, <sup>2</sup>nui isubigwan Jesucristoinug pasra tøgagig, tru cierton nai nusrkai lataig ñi Timoteowan i kilgawan pørar. Tius Møskaimba, Cristo Jesús namui Señorba nui ka yandø tab indigwan køben, lastima asigwan køben, chi isumgaig tab købigwan køben ørtraimab isua inchar.

## Ashiptø kønrrai wamindig

<sup>3</sup>Na Macedonia pirausrømay inrrab pasramisra, 'tiusmanda ñune Efeso kørrømisrtra' cha eshkaig købig kuig køn, tru møyiløgøsrøn sølwan kømø, ke peemaytø kusrenaniiløtøga kusrenanøbelan treegwan kusrenanmønrrai merab ashib pasrønrraimba, <sup>4</sup>katø chi treeg kømubendø nõmdø isua wamindiilanba, katø nõmbe 'i misaamerainukkurri amrrubelø ker' chib, tru munchimera kan managuen patsønrrabgaig arrubigwanba, tru kuindø møyøb pønrrømønrrai ashib pasrønrraimba. Treeløbe ka kwayab waramigweindø køn, tru isubigwan Jesucristoinuutø pasra tru Tiusweimburabelan marøbig marøb ambamigwan purugunrrab kømøtø.

<sup>5</sup>Inchen na iigwan martrai karua pasriibe iig køn: tru manrrau chishchigugurrimba, isub kebachib pasrabigu chi kalø køn chibig chigaig, tabigugurrimba, katø isubigwan Jesucristoinuutø ka inchib kømø, cierton pasra tøgagúigugurrimba undag købig arrubiitøga undaaramig. <sup>6</sup>Inchawei møyiløgøben truiløma øyeeg kømigwan yandø pella tarømisra, nõmuimburab ke ka chine wamincha møyøb kuiløyutø chab tarømisrin køn. <sup>7</sup>Tru maig maramigwan martrai Moisés pørigwane ke nõm kusrenanøbelø køg kui inchibelø køn, nõm wamindigwane nõmdøweinguen ni chigúinguen mørmøwei, katø 'iibe treeg kømønrrab kømø, treeg køn' chib wamindiilan chigucha chigúinguen mørmøwei inchendø.

<sup>8</sup>Pøs tru maig maramigwan martrai Moisés pøriibe tabigwein kui ashibwei inchibelø ker, tru chiyuwei maramigwan treegweyasig merrarrawa marene. <sup>9</sup>Inchawei tru maig maramigwan pøra warøppe, tru tabig sølwan marøbelain

kòmõtø pøra warig kui nambe ashibelø ker. Treeg kòmõtø, tru larrø kailaimba, mørmeelaimba, chigucha Tiuska misaameraimba, kaig marøbelaimba, kaig maramigwane chi kørikkengaig marøb misaameraimba, Tiusweimburabelane ke ka kaigwan lataig inchibelaimba, usri møskalan kweechibelaimba, ka kweecha petaptø amøñibelaimba, <sup>10</sup>møguelø ishumburba nømui asrtøga trømbøig marøbelaimba, katø møgueløbe møgueløasiyaitø trømbøig marøbelaimba, misagwan karuindiig melønrrai nila yanøbelaimba, isa waminchipteelaimba: ‘nabe si, isatø waminchimur’ chibendø, isapteelaimba, tru tabig sølwan kusrenanigwan chigurrimbunø kaitøga itøøra pønsrcøbelaimba køn, <sup>11</sup>Tius mayanguen tabigwei tru tørbilabig tabig srø wam maig køben treetøwei kusrenanigwan. Truigwane na waminchib tøga pasrønrrai Tius nan tranig køn.

### Tiuswan ‘maya nuguen ungwa’ chib

<sup>12</sup>Cristo Jesús namui Señorwan na ‘mayanguen ungwa, ungwa’ chinrrab, muraaramø marøb megamig kønrrai tranøbigwan, kaguende tru nui marameløyu chi isumgaig marøb meganrraptiig kui asha nan pasrigwan.

<sup>13</sup>Nabe merrabsrømbe nun purø trømbøig wamaptiig, katø Tiuswei uremeran kaig maramigwangøba lab, larrø namiguig maig købash inchiptiig købig kuingucha, nane lastima asig køn, kaguende nabe chigúinguen ashmíig køremíig kua, øyeeg marig kuikkurri. <sup>14</sup>Inchendø namui Señorwei tru ka yandø tab indiibe naim pala purab nuikken arrig køn, tru isubigwan nuinuutø pasra tøgagømba, undag købiiba kanbalatø Cristo Jesúsweinug pasrabig.

<sup>15</sup>Inchawei i trendaibe chi isumgaig isig kòmõtø køn, mayeeløba chi kashmø, ka utamig: Cristo Jesúsbe piraumay arruppe, kaig marøbelan kaigyugurri wesranrrab arrig køben, tru truilai utu purab kaibe na kur.

<sup>16</sup>Incha Tiusbe treeg køptøwei nane lastima asig køn, tru kaig marøbelai utu na mas larrø kaigwan Jesucristobe chugatikkucha nø nan tammay ka awentab wabig kuin kui kenamartrab, tru managatig øsig kømigwan tøgagønrrab, tru wendøsrø nun kørenrrabelø nan øyeeg marigwan asha kønrrai. <sup>17</sup>Inchawei managurri managatig mayeelaim pala nø ashib wabigwan, managatig øsig wabigwan, kaptøgabe asiimíigwan, Tius nø kandø wabigwan managatig nun purø tab indig kønrraimba, maya nuguen tabig kønrraimba inchar. Treeg kønrrun.

<sup>18</sup>Timoteo, nai nusrkai lataig, ‘i maramigwan martrunrrig’ cha na ñun karua pasrar. Tru ñi maig kønrrabig kuigwan merrabsrøwei ñuimburab Tius maig karuben eshkailan, truilan isua pasramisra, Señorweimburabelan elatchab kømø, may kwayanrrig, <sup>19</sup>isubigwan Jesucristoinug pasra tøgagúigwanba, isub kebachib pasrabigu ‘chi kalø køn’ chibig chigaig kømigwanbabe tindøgague. Pøs møiløma nømui isub kebachib pasrabigu ‘kalø køn’ chib kebati mørendøgucha mørmøwa, tru nømui isubigwan Jesucristoinug pasra tøgagúigwane kan nubi itøgasrai lataig kørrømisra, yandø trubisan. <sup>20</sup>Truilai utube, Himeneoba,

Alejandroba treeg melan. Inchawei nabe truilane Satanás nø asha martrai nui tasku pønrrar, Tiuswan purø trømbøig wamumum kusrenrai.

### Tiusba mandø wamindamig

**2** <sup>1</sup>Inchawei iilanmerrig marøb kønrrai eshkawa pasramønrrun: 'øyeeg, øyeeg palai meler' chib Tiuswan miab, katø Tiusba waminchib, katøganelayasig Tiuswan 'purugurra' cha miab, katø mu møguelayasiitøgucha Tiuswan 'ungwa, ungwa' tamig køn, <sup>2</sup>reymerain køben, katø norrreelø misagwan ashib karub purrabelain køben. Masken chi isumø tab waramdiig, ambumay imay chigucha chi kuin kømø, Tiusweimburabelan tabig marøb, chiyutøgucha mu chi tamgaig waramig kønrrai. <sup>3</sup>Kaguende øyeebe tabig køn, Tius namui Kaigyugurri Wesrabiibe tab kuinguen asig. <sup>4</sup>Kaguende nøbe maya misaamera kaigyugurri wesrailø kønrrai indan, tru nui newan ciertonigwan nebua ashchai. <sup>5</sup>Kaguende Tiusbe kandø nøtø køben, katø Tiusba misaameraimba tøbøtag pasramisra purø waminchibikkucha kandø køn, Jesucristo møg. <sup>6</sup>Truibe nøashib maya misagwan kaigyugurri wesranrrab nø kwaitøga pagaraig køn. Incha iigwane yandø ke treeg maramig puben, eshka wamindig købig køn. <sup>7</sup>Inchawei øyeegweyasig nabe Señorwei wamwan waminchib kusrenanrrai wesrawa pasrig, katø Jesucristo nøashib karua ørig kur, judíos kømø misaameran tru isubigwan Jesucristoinug pasra tøgagømigwanba, newan ciertonigwanba kusrenanrrai. Iigwan nabe isa waminchimur.

<sup>8</sup>Inchawei chutøgucha møgueløbe Tiusba waminchippe, chi kaig marig chigaig tasigwan chishig kusrub pønrramig køn, truba namig kuim palatø kømøwei, muba aleguiyawa kømøweingue. <sup>9</sup>Katø ishumburmeragucha asru keppe, chull ashchai purab tabig kemumig køn, maig kemigwan treetøgue. Pusrugwangucha tamarøppe, ke purø tabig tamarmøwei indamig køn, orotøga, kabe tab sruuzheeløtøga. Katø keiløgucha ke purab norrøweyelø kemøwei indamig køn. <sup>10</sup>Treeg kømøtø, chigøben tabig mariiløyu tabig kønrrab indamig køn, ishumburmera Tiusweyasig tabiitø martrab pønrramisrøbelø maig kømig køben treekke. <sup>11</sup>Ishuumisaabe kusreb wappe, niløtø wamig køn, trurrigu maig købendiig inchimø nømun mørøb. <sup>12</sup>Kaguende nabe kan ishuumisaabe kusrenanmønrrai inchar, katø mowan ke nø karunrrain kømøweingue. Treeg kømøtø, niløtø wamig køn. <sup>13</sup>Kaguende Tiusbe srøsrø marøppe, Adánwanmerrig marig køn, trugurrimbe Evan. <sup>14</sup>Inchagucha isa waminchen truyu kebenippe, Adán kømøtø, Eva kebenig køn. Incha yandø kaig srua irramaikkurrimbe, yandø kaigyu kebenig køn. <sup>15</sup>Inchendøgucha ishuube ureg tøgagua, kaigyugurri wesraig kønrrun, tru isubigwan Jesucristoinuutø pasra tøgagøbig tøgagøb, undag købigwan tøgagøb, Tiusweyasiitø tarømarig, trurrigu maig kømigwan tøga uñabe.

**Tiuswei ureemeran mandø pera pasramigwan wamindig**

**3** <sup>1</sup>Inchawei i trendaibe chi isumgaig isig kòmøtø kòn. Møikkøben Tiusweimburabelan ashib pera pasrønrrab isubiibe, tabigwan marøb meganrrab isun. <sup>2</sup>Trube treeg kòbene, tru Tiusweimburabelan ashib pera pasrabiibe, mugøben ‘ñibe øyeeg kòn’ tainanrrabgaig kòmig kòn. Kan sraindø tøgäig, chigøbendø incha ashmøtø, maig pasramigwan pasrabig, maig unamigwan tab isua møra uñibig, katøganelø ‘øyeeg kòn’ cha, chi tainanrrabgaig, katø mugøben nui yau pubelane, yaambumay wamønrrab muniitø wabig. Katø kusrenanrrab kaimabig kòmø, kusrennøbig, <sup>3</sup>vino menrra mucha mutsiiraptiig kòmøwei, kwayam lamig larrø chullig kòmøwei, treeg kòmøtø, purø tab inchibig, kwayamigwan kòmø, tab kòmigwangøba labig, anwan larrø chullig kòmøwei, treeg kòmig kòn. <sup>4</sup>Katø nui yaambu mandø maramigwan asam kusrebig, nui ureemeragucha nø maig taigwan mørøbelø tøgäig kòmig kòn, maig kòbash inchimeeløgue. <sup>5</sup>Kaguende nui yaambuguen mandø maramigwan asam kusremfibe, ¿Tiuswei iglesiayuelane kan mandø asha marøb pasraiasamø? <sup>6</sup>Tru Tiusweimburabelan asha marøb pasrabiibe, Tiusweiwan ke mõi srø nebua ashib megabigwan pasramig kòmøn, ke purab nuig kurmab inchib kebya, inchippa tru nugwaimandzigwan møra pasrønrrai pasrinuutøwei kebeñib megamønrrai. <sup>7</sup>Katø nøbe Tiuswan ashmø misaamera mendailø chi tamgaig chiyutøgucha sölwan uñibig kòmig kòn, nøguen treeg kòmubendø, ka isatø inchib pasran tainab pasrømøwei, katø nugwaimandzig chiyugøben kebeñchai pasrigu, truyu kebeñib megamøwei inchai.

**Iglesiyu purugub pønrrønrrai pønstrailan maig kòmigwan wamindig**

<sup>8</sup>Katø diáconosmera, tru iglesiayu purugunrrai wesrawa pønstrailø chigucha, mugøben chine cha asinamø møguelø kòmig kòn, chigøben martrab chippe, ka wamindiitø kòmø, martrab waminchibelø, katø vinon menrra mucha mutsiirapteelø kønrrab kòmøweingue, maramgaigwan mara, ke chinchä kòben an nørø katøramigwangøba lamøwei inchibelø. <sup>9</sup>Tru isubigwan Cristoinug pasra tøgagúigwei sorig pasrabigwane tin tøgä pønrramig kòn, nømui isub kebachib pasrabigu chi kalø kòn chibig chigaig, chishchig tøgague. <sup>10</sup>Tru iglesiayu purugub pønrrønrrabelane maig kòtashchab ashibmerrig asiilø kòmig kòn. Inchen yandø ‘chi kòn’ tamgailø kuikkurrimbe, iglesiayu purugunrrab diáconosmera pønrramistrun. <sup>11</sup>Katø ishumburmera chigucha, mugøben chine cha asinameelø kòmig kòn, ambumay imay wam kusrab, wam niga lliramøwei, ka chigøbendø incha ashmøtø, maig pønrramigwan pønrrabelø, katø chiyutøgucha chi isumgaig pønrrabelø, treelø kòmig kòn. <sup>12</sup>Iglesiyu tru diáconosmerabe kan sraindø tøgä kòmig kòn, katø nømui ureemeran tab asam kusreb, nømui yaambu chitø maramigwan asam kusreb inchibelø. <sup>13</sup>Kaguende tru diáconosmera nømui maramigwan tabig marøb pønrrabeløbe truba tab

pera marøbelø kui asiilø køb, katø tru nømui isubigwan Cristo Jesúsweinug pasra tøgagúigwane masken chigucha chi kørig isumø eshkað pønrrønrrun.

### Purø nuig tabigwan mu nebua asiimíig pasrabig

<sup>14</sup>Na iigwan ñun pørar, petø ñun ashchab attrab isua. <sup>15</sup>Inchippa nan petø arrum nebumub chi inchene, trube, Tiuswei yauelai utu ñi mandø megamigwan tab isua pasramig kønrrai inchar. Truibe Øsig wab Tiuswei iglesia, tru newan ciertonigweyasiibe pilar lataig, merrarrab pasrabig, truing køn. <sup>16</sup>Inchawei mu ‘treeg kømøn’ chib pønrramga, nam Tiusweimburabelan marøb pønrraig mu nebua asiimíig pasrabiibe, purø nuig køn:

Cristobe kan møg lataig asrbaig kenamisrøb,  
 Espíritu nune chigucha kalø marmíig,  
 tabig kui kenamarig køb,  
 katø nøbe ángelesmera asig køb,  
 judfós kømø misaamera wammøra kønrrai wamindig køb,  
 yu pirau misaamera nune kørewa pønrramisrig køb,  
 katø nune srømbalasarø tørguegwalmabiisrø utig køb køn.

### Tiusweimburabigwan elacha kaigwan marøb kurrabelan wamindig

**4** <sup>1</sup>Pøs Espíritu Santobe tørgandø kelarrab eshkan, srabe kwalømmerawane møiløgøben nømui isubigwan Jesucristoinuutø pasra meløwa truyutø melømøtø, chab tarømisra, kwaimandziimera kegørrøsrkøbelan tru kuindø mørøb, katø kusrenaniilø kwaimandziimeraimburabigugurri arrubigwan mørøb kebamrrun cha. <sup>2</sup>Treeg kusrenaniiløbe tru purø trømbøig isa waminchibelø ka palatø tab inchib misaamerainukkurri arrubig køn, kørig tøgagønrrai tru nømui isub kebachib pasrabiibe yandø nasrkwailø tøgar, kan tsandzøn pachibiitøga parri latailø. <sup>3</sup>Tru misaamerabe kasharamønrrai meramba, katø mø mamimerane mamønrrai meramba inchun, tru newan ciertonigwan nebua asha kørebelø, ‘truba unywa’ chib manrrai Tius mara pønrrailan. <sup>4</sup>Kaguende chiwandøgucha, Tius nø mara pønrraibe kaig kømø, tabig køn. Inchawei Tiuswan ‘mayanguen unywa, unywa’ chib utigwane nambe chiwangucha kashmumig køn. <sup>5</sup>Kaguende Tiuswei wamgurrimba, Tiusba wamindikkurrimba tabig chishig kønrrai marig køn.

### Jesucristo karua pasrigwan purø tab marøb megabig

<sup>6</sup>Inchawei namui nunelan iilan kusrenanøb, katø tru isubigwan Cristo Jesúsweinug pasra tøgagøm wamdøgaba, purø tabig kusrenanigu treegwan marøb arriitøgaba chishkandø pasramig kønrrai marig pasrøwabe, ñibe Cristo Jesúswei truba tab marøb megabig kønrrabguen.

<sup>7</sup>Chi treeg kømubendø, nømdø isua chugúinguen mormubendø wamindiilanba, ishumburmera køllizheelø kagatø ka wamincha møriilanba, mørøb pasrømumig køn.

Ñibe masken Tiuswei tabigutø marøbig marøb meganrrab isu. <sup>8</sup>Asr chishtø kørnrai eshegøb luliima, maitøguen purugúibe, tru mas Tiusweimburabelan maikken elachimø marøb megaig truibeguende, chiyutøgucha lutøgurri tab kørnrai purugubig køn. Kaguende yu mõi øsig waraigu lata, katø wendø attrabigu lata, tabigwan tranrrab misrig tøgagig køn. <sup>9</sup>I trendaibe chi isumgaig isig kømøtø køn, mayeelø treeg kuitamab isua chi kashmø utamig. <sup>10</sup>Incha øyeekkurriwei nambe i maramigwane ¡katø! martrab isua marøb, maig kuingucha kullaarab elachimø marøb melabelø ker, kaguende nambe Øsig wab Tiuswan muniirab melabelø kuikkurri, tru mayeelan kaigyugurri Wesrabigwan, nun kørebelaneguende wesrabwei inchibigwan.

<sup>11</sup>Iilane ñibe maringarub kusrenanrrig. <sup>12</sup>Ñi unøtiig kuikkurri mugucha kaasiinab pasrønrrab kømøtø, masken ñibe Jesucriston kørebelayasiibe ñi chi wamindiiløyu lata, maig køben kømø, tab isua unigu lata, undag købigwan tøgagúigu lata, ñui subigwan Jesucristoinug pasra tøgagúigu lata, kaig marmø chishig unigu lata, nømguen ñun asha kusrenrai megamig køn. <sup>13</sup>Na arrumnegatiibe mayelai merrab, Tiuswei wamwan pørigwan leb, ‘maig melamigwan treeg marøb melay’ chib, kusrenanøb indamig køn. <sup>14</sup>Ñun Tius keta traniitøga chigøben marøbig kuigwane pesannab elachib pasrønrrab kømø, Tiusweimburabelan pera marøb pønrrabelø nøm mayeelø misra nømui tasiimeran ñuim pala estsara, ñi chigøben marøbig kønrrun cha Tius maig karuben ñun eshkaig købigwan.

<sup>15</sup>Iilandø ñiguen tab isub kebya, truigwandø martrab pasramisr, Tiusweiwan ñi katøguchinguen nebua ashib megaigwan mayeelø nebua ashchai. <sup>16</sup>Pøs maig kømigwan ñiasiitø ñuimburaptøwei tab ashiptø megau, katø tru ñi kusrennøb megaigwan chigucha. Truigwane elachib pasrønrrab kømø, kerriguba marøbig marøb megau. Ñi treeg marøb megawabe, ñiasiitøwei kaigyugurri webib, katø tru katøganelø ñun mørøbelan chigucha kaigyugurri wesrab inchabguen.

### Tiuswei ureemeraba mandø kømigwan waminchib

**5** <sup>1</sup>Kølli misagwane tsakkandø namig wamømøtø, masken tammaytø, wamindamig køn, maig melamigwan treeg marøb megamig køn chib, kan møskawan lataitøweingue. Inchen ureeteelane ñui trag nunelø kui lataig indamig køn. <sup>2</sup>Inchen ishumbur køllizheelane ñui usrin kui lataig inchippe, srusralmerane ñui trag nuchalø kui lataig indamig køn, chigøben kaig isua kømøtø, tabig chishigwan isuague.

<sup>3</sup>Inchen piudamera kerriguwan nømdø kørromisrar kerrigu mugucha ashchaptiig chigarwane tabig purugunrrig. <sup>4</sup>Inchen kan piuda nusrkalø kui, kabe awelumera kui tøgagig købene, trube, tru ureemerabe Tiusweimburabigu maig maramig køben treeg marøb, trube, tru nusrkaløbe nømui yaelai chi palabigwane nømwei ashib purrønrrabelø køn, nømunma maig tabig marig købig køben, kølleelan treetøwei marøb. Kaguende øyebe Tiuswei merrab

truba tab kui asig køn. <sup>5</sup>Inchen piuda tru kerriguwan nõtøzhig, yandø nõtø kørrømisraibe, Tiustøwei purugunrraitamab isua pasramisra, yem kwaløm Tiusba waminchib, purugurrunrig chib miab megabig megan. <sup>6</sup>Trune piuda tru nõtø kørrømisrøbig nun maig marøg købendø marøb pasrabiibe, øsig uningucha nõbe kwaig lataig køn. <sup>7</sup>Øyeeg maramelangucha marmø kømø, martrain karunrig, mugøben 'kailø køn' tainab pønrramig chigargønrrai. <sup>8</sup>Pøs møikkøben nui nømmissagwan lata, katø nui naachaguelandøweinguen isua ashmfiibe nui isubigwan Jesucristoinuutø pasra tøgagúigwan wendøbasraig, katøganelø Tiuswan køremeelø lataguen kømø, purab kaikken køn.

<sup>9</sup>Tru munchimeran pøra tøgagúigu kan piudai munchiwan keerøppe, sesenta añoskurrimbuniigwandø pøra keeramig køn, trurriгу nui keebatø megabig købigwan. <sup>10</sup>Truibe chigøben tabig mariiløyu mu kui asig kømig køn: nui uregwan nørrøranøbig, katø mugøben nui yau pubelan, yaambumay tab wamab wabig, katø Tiuswei misaamera yau puben, srøbmeran kwallibig, katø chine kaig nebuilø melabelan purugub megabig, katø chine tabigwane marøb megabig treekke.

<sup>11</sup>Inchendø tru piudamera ureeteelø nõmdø kørrømisrøbelane, tru munchimeran pøra tøgagúigu nõmungucha tøga kerbasamig kømøn. Kaguende nõmui asru kaig marøg købig arrubiitø, Cristoinukkurri tarømarene, katø kasharag kui inchib mendabelø køn. <sup>12</sup>Inchabe tru Criston srøtø nebua asha tru nõba pønrrønrrab misrig købigwan treeg martrab kaima, kaigyu pønrsailø kønrrab pønrramisrøbelø køn. <sup>13</sup>Inchagucha ke yamørig, yamørig llirab pønrraptø, yandø pøiløguen misrøbelø køn. Trurriгу pøiløtø mismrøtø, katø ambumay imay wamniga lliramba, katø chiyugøben kegalamørøb, chi wamindamgailan wamincha møramba inchibelø køn. <sup>14</sup>Inchawei treekkurri piudamera ureeteelø nõmdø kørrømisrarbe nabe ka kasharanrrai inchar. Ureemera tøgagøb, katø nõmui yaambu mandø purramigwan asam kusreb inchai, Satanás, tru ashig kømui inchibig, chinetø tainab pønrramig chigagønrrab. <sup>15</sup>Inchawei piudamera mõiløma, pella chab tarømisra, Satanáswei maywan wendautø chab ambubguen indin køn. <sup>16</sup>Kan ishug Jesucriston kørebig nui yau piudamera tøgaguabe, purugub nõ asamig køn, iglesia ke tranrraindø muniirab kømig kømønrrai. Øyamaybe tru piudamera kerriguwan mugucha ashchaptiig chigarwan, maig palabigwan ashib tøgagømig chi palømønrrun.

<sup>17</sup>Iglesiyau maig køben kømønrrai truba tab ashib, Tiusweimburabelan pera marøb pønrrabelane nõm mandø tabig indig kønrrabelø køben treegwandø tab inchimøtø, maya nuguen tab inchib tøgagømig køn. Tru Tiuswei wamwan waminchib eshkamiguba, kusrennamiguba, truigwandø truba martrab isua merrarawa pønrramisrøbelan. <sup>18</sup>Kaguende Tiuswei wamwan pørigube trenchibig køn: “Kan wey, tirigun kwattrai itøbunab megabigwane, mabashig kømub pusalgutsamig kømøn” cha. Incha katø trenchibig køn: “Chi maramigwan marøb megabiibe tru nõ marøb megaimburø pagar utamigwein køn” cha.

<sup>19</sup>Tiusweimburabigwan pera marøb pasrabigwane kaig køn tainab kemesrøb srua kønrrai inchimumig køn, tru treeg marigwan kan pailø kui, pønelø kui nømashib ashibelø treeg køn chib eshkanrrabelø kaabene.

<sup>20</sup>Inchendø kaig maramigwan elachimø marøbig marøbelane 'øyeeg marmumig køn' cha, mayeelai merrab mur alegamig køn, katøganeløgucha treegwei marmønrrab køriimatønrrai.

<sup>21</sup>Tiuswei merrappa, Jesucristoi merrappa, katø ángelesmeran Tius lawa wesrailai merrappa, iig øyeeg maramelan marmø kømø, ñi martrai karua pasrar, kabe møigwane purømisrøb trugatøtø inchab kømøwei, møigwandøgucha lata asha maramig køn. <sup>22</sup>Chigøben marøb pasrønrrai wesrawa pasrtrab, ke møi møi tab ashmubendøbe, møigweim pala køben, ñui tasiimeran estsarmøta, nømui kaig mariilan ñigucha tøgatø marøb pasraig webimønrraimbe. Chigucha kaig martrab kømø, tabig chishig pasrønrrig.

<sup>23</sup>Møingurrimbunøbe, tsøøbitø, tsøøbitø muchimøtø, katø lamøzhig vinogucha mutchig. Kaguende ñibe patsø tre tab kømuinab, kwanrrømeragucha chi kwanrrø køben katø katø webarrinabig køn.

<sup>24</sup>Kaig mariilø kan utu møguelaimbe maig køtashchab asamig pumøwatø tørgandø kenamisrøbguen indan. Inchen kaig mariilø katøganelaiwane tsøndatøsrø treeg kuin kui nebua asiilø køn.

<sup>25</sup>Katø treetøwei chigøben tabig mariiløgucha tru urastø tørgandø asamdiig kenamisran. Inchen tabig mariilø katø møi møi kenamisrmø pønrrabikkucha, asiimíig treetø kørrømisrmøtø, kenamisrøbig køn.

**6** <sup>1</sup>Ñim møitøgucha ka karua srua kuindiig melabeløbe ñimun karub pera købelane ka palabinø inchib maig købash inchimø, tab indamig køn. Tiuswei munchiwanba, katø tru tabig kusrenaniilanba purø trømbøig wamindig kømønrrai. <sup>2</sup>Inchen ñim møiløgøben, ñimun karub pera købelø Jesucriston kørebeløtøwein tøgarbe, Cristogurri nunelø kønmaptø, maig køben palabinøtø indamig kømøn. Masken treeg kømøtø, purø tabguen mara tranøb melamig køn, kaguende nømui maramelan ñim mara traninabeløbe Jesucriston kørebelø undaaraig nunelø kuimba. Iigwane kusrenanøb, øyeeg marøb kømig køn chib waminchig.

### Chigurrimbunø palømíig purø tabig ciertonig

<sup>3</sup>Namui Señor Jesucristoi chigucha chi kalø kusrenaniimíig tabiiba, katø Tiusweimburabelan nam marøb kømig kusrenaniiba truig maig køben treetøwein kømøtø, møikkøben ka peemaytø chi tabig kømíig kusrenanøbiibe, <sup>4</sup>nøasiitø purø kusrebig kurmab indan, chigucha chi kusremíig købendø. Incha maig kø chib payib aleguiyamig, chigøben wamindiilan kwayam lab wamindamibe, kan kwanrrø lataig nigaig køn. Incha øyeekkurrindøwei truyugurri arruppe, katøgan chigøben tøgagøben pusrkwai asamig arrumba, kwayam lamig arrumba, katøganun trømbøig marøb tsalø wamamig arrumba, chigøben kemesra trømbøig isub amønamiig arrumba, <sup>5</sup>katø tru kaig maramig isubiitø nømui turmera



mindiił tōga misaameraba ke chi kōmubendø ka kwayab kōmig arrumba indan. Truiløbe tru newan ciertonigwane kerraig chiga misaamera, Tiusweimburabelan marøb tōgagúigwane nōmbe trutōga an marøb pōnrramigweyasig tōgar kōn.

<sup>6</sup>Inchen nam maig tōgagúizhiitōgatø kasraatø melabelaimbe tru Tiusweimburabelan marøb tōgagúigugurri, chigurrimbunø tōgagōmig arrubwei inchibig kōn. <sup>7</sup>Kaguende nambe yu piraumayma, chigucha chigar yandiig amrruig kōppe, katø treetøwei chigucha chigar ambamig kōnrrun. <sup>8</sup>Inchawei nam mamig tōgagøb, asru kemig tōgagøb indinukkurrimbe, trutōgabe kasraatø amōnamig kōn. <sup>9</sup>Kaguende pua misrøg kui inchibeløbe, chine tabig lataig kenamisrøb arruben, treegwan chull asha kegørran. Incha chine chine nebunrrab isuptø maramgaigwan mariiłoyuba, katø ka trømbøig mincha pōnrramig kōnrrai mariiłoyuba kegørra pōnrramisren, truiløbe mōguelane yandø chindamikkuchagaig misra pōnrrōnrrai kegørrørkøb, managatig kaigu kegørra pōnrramig kōnrrai mara pōnsran. <sup>10</sup>Kaguende chigurrimbunø kaig maramig arrubiibe, anwan įkatø! ke kan chinchimmørø inchib chull indiiløyugurri arrubig kōn. Inchawei mōiløgøbenma an tōgagug kōbiitø yandø pella, nōmui isubigwan Jesucristoinuutø pasra tōgagúigugurri tarōmisra, nōmasiitøwei chine chine purø isumdiig puig melōnrrab tōga pōnrramisran.

### Kōrrōmisrmø ibig inrrai wamindig

<sup>11</sup>Trune ñi Tiusweyasiitø pasrab mōøbe treeg indameløyugurrimbe tarōmisramig kōn. Sōlgandø tabig kōmigwanba, Tiusweimburabeløyu tabig kōmigwanba, isubigwan Jesucristoinug pasra tōgagōmigwanba, undag kōbig tōgagōmigwanba elachimø marøbig marøb megamigwanba, katø maig kōbendø inchimø, purø tammay megamigwanba, ilan martrig. <sup>12</sup>Ñui isubigwan Jesucristoinuutø pasra tōgagúigwane ñi tōga pasrōnrrab isua kwayab, tru managatig øsig kōmig tōgagúigwane pachamørtrab kōmø tab tōga pasrau, Tius trunun tōgagōnrrai wamøben, tru ñi truba yamelai merrab, purø tabig pasrōnrrab waminchib pasraig kōbigwan. <sup>13</sup>Katø chigurrimbunø pōnrrabigwan øsig kōnrrai tranøb Tiuswei merrappa, katø Poncio Pilatoi merrab, purø tabig nō maig kuigwan ‘nabe treeg kur’ chib, waminchib eshka pasrabig Cristo Jesúswei merrappa, nabe ñune karua pasrar: <sup>14</sup>tru martrai ñun karua pasrigwane kaig mariitōga chillig indig chigaig, katø chigøben ‘kailø kōn’ tainab pasramig chigaig, treeg tōgagōnrrai namui Señor Jesucristo kenamisramnegatig. <sup>15</sup>Yandø tru treeg maram kwalōmmerra puben, trunun nō kenamartrab kuinrrun, tru nō mayanguen tab indig, tru nōtø Mayeelaim Pala Pasrabig trurrigu maya reymeraim pala nō Rey, katø maya misagwan ashib karub pōnrrabelaim pala Nø Karub Ashib Pasrabig. <sup>16</sup>Managuen kwanrrabig kōmfiig, muguen kemalamgaigu tōrguegwalmabigu wabig, nune mu mōkkucha asiimfiig, katø mugucha nune ashchab kaimaig, Tius nōtø kōn. Treegwan purø tab indiiba, managatig mayeelaim pala karub wamibabe nuyasig kōnrrai inchar. Treeg kōnrrun.

<sup>17</sup>Møin kwaløm yu pirau pua misaamerane puarmera kermaptø, purab nørreelø kermab inchib, tru chigurrimbunø tøgagúilø treetø kønrraitamab isumgailøyu ke truyutø isua pønrrømønrrain karunrrig. Masken treeg inchimøtø, nam kasraatø tab kui warønrrai Tius tru chigucha palønrraingai tøgagømburab tøgagønrrai namun tranøbigweinug isua pønrrønrrai inchig. <sup>18</sup>Tabigwan marøbelø kønrrain karunrrig, truba puarmera misrøppe, nømui chigøben tabig mariiløyu puarmera misrtrai. Tøgagúigwane chigucha merø kui inchimø, lata pirishib purugunrrab muniitø købelø kønrrai. <sup>19</sup>Øyamaybe tru wendøsrø attrabigweyasig, tabig pølbasa marøb esegab kebamrrun, øsig kømig, tru managatig cierton øsig kømigwan nebua tøgagømig kønrrai.

### Timoteowan wamindiilø srabeig

<sup>20</sup>¡Au! Timoteo, ñun chi martrai trana pasrigwane tabig isua møra tøgagu, Tiuswane chigucha kømíig marøb wamindiilanba, ke ka wamincha møriilanba, katø tru nømui nørrø nebua ashib kusreb taig chi cierton kømíigwanba, treelan mørøb pasrønrrab kømø meganrrig. <sup>21</sup>Pøs møiløgøbenma trunun marøb kebamba, nømui isubigwan Jesucristoinuutø pasra tøgagúigugurrimbe yandø pella, chab tarømisran. Tiuswei ka yandø tab indiibe ñimba pasrønrrun.